

續修懷德縣志第十一卷

藝文

書目

序

記

詩

續修懷德縣志

卷十一藝文

二十七

新京福文盛印書局印

續修懷德縣志第十一卷

藝文

書目

鹿苹齋詩文集

榮文達著

墳簾集

榮文昭著

雪石齋詩集

榮文祚著

懷德鄉土志

趙鑑清榮文昭孫雲章分著

耕禮堂家訓

趙鑑清著

耕禮堂家乘

趙晉臣著

師竹齋吟草

趙晉臣著

續修懷德縣志

卷十一藝文

二十八

新京福文盛印書局印

師竹齋叢著

趙晉臣著

懷德禮俗表

孫嶽金著

晚晴樓吟稿

趙晉勳著

序

耕禮堂家訓序

世 榮

耕禮堂家訓一編吾友趙君迺唐之尊翁聲遠先生生平教家訓子之所爲作也先生世居吾奉懷德縣隱居不仕素以德望尊一鄉榮生也晚弱冠前後足跡不出里巷於吾鄉顯達君子伏處碩人多不聞知遊庠後館於省中適吾奉先達曾與九先生主講席榮與迺唐同遊其門時於衆中窺見迺唐課藝寫作迺出塵表心竊異之知非如榮之幼而失教東塗西抹者比乙未同上春官乃訂交於京邸榮旋以菲材入詞垣而迺唐竟以入選而被擯其時聯床共話相對孤燈殊黯然也迺唐亦善自

續修懷德縣志

卷十一藝文

二十九

新京福文盛印書局印

排遣相與講道談藝不輟迺唐素封而儉約乃逾寒士時叙家常始知迺唐非惟自勵之刻亦由先生督責之嚴維桑與梓必恭敬止迺唐有焉然此時但知迺唐之足以克承堂構而於先生之蘊蓄宏深言坊行表篤實光輝之誼尙未能仰窺其萬一也後十餘年迺唐以孝廉納粟爲郎同官京師結鄰而處朝夕往來情誼尤篤前清宣統三年爲先生古稀壽辰迺唐出先生行述囑爲壽序乃知先生自少至老立身行己涉世持家無一不以聖賢相砥礪民國二年先生以疾卒於里第迺唐昆季乃馳書囑榮題先生木主榮乃躬臨弔唁迺唐復於苦次出先生斯編泣而言曰先君以是編課不肖兄弟不肖兄弟大懼弗

克負荷以貽先君羞今欲刊印以藏於家以爲世世子孫之法君其以爲如何榮薰沐受而讀之乃肅然正襟而言曰此非今人之言乃古人之言也乃古人省身克己型家訓俗合人已納諸軌物之言也昔桂林陳文恭公輯古今嘉言懿行爲五種遺規一書二百年來海內翕然向風近年興立學校至列爲修身專本蓋以其言如布帛粟菽淺之雖婦人孺子固須臾而不可離精之即名公鉅卿亦終身而不能盡今先生斯編由積德讀書至置義田贍族凡三十八篇言言金石字字龜鑑方之古人何多讓焉孟子云道在邇而求諸遠事在易而求諸難人人親其親長其長而天下平是編言近旨遠守約施博善言善道於

是乎在然則持此一編雖以之治國可也平天下亦可也豈徒家訓云乎哉榮自束髮讀書每以前言爲可信意凡束身庠序者當無不以聖賢爲依歸矣乃自入世以來見有所謂文人學士者焉文采非不炳然也至課以修省則多疏見有所謂大人先生者焉聲勢非不赫然也至責以勛名則不逮甚或蕩軼閑檢破抉藩籬舉凡詩書道德之舊皆欲掃除而弁髦之以快其狙詐恣睢之計卒之害於而家凶於而國己之身亦莫保焉遂至釀成今日泯泯棼棼不可收拾之世局蓋人心之偷也非一日矣誠得先生是編而補救之將人人奉爲圭臬家家視若準繩吾知孝子順孫由此生仁人君子由此成世道之興也可立

而俟之耳詩云雖無老成人尙有典型其此之謂歟然則斯編之出豈不足爲振發矇聵之鐘鼓掃蕩陰霾之日月乎所願迺唐昆季其勿以爲私家纂述無與世道之隆污而不廣爲流傳焉此則區區之忱之所深望也夫

雪石齋詩集序

孫 雄

懷德榮君祉字可民先生之季弟也先生爲遼左耆儒門下士傳其衣鉢多騰達負時望有游至開府秉節鉞者士論以爲榮而先生落拓不偶僅登同治癸酉拔萃科至光緒癸巳中順天鄉試副榜與予爲同年生祉字幼時受業於先生爲詩文悉經指授有法度可觀光緒甲午捷秋闈出楊子青前輩鍾羲之門

續修懷德縣志

卷十一 藝文

三十一

新京福文盛印書局印

厥後獻藝南宮屢薦不售服官戶部錚錚有聲辛亥國變隱居舊京以詩文自遣與予交契垂四十年志同道合嚶鳴無間且有昆季之好予長於祉字者五年祉字醇篤謙謹竭盡兄事之禮比歲都會南遷干戈俶擾予蟄伏燕京繫匏不食實賴祉字時時存問分金周急焉祉字素豪於飲己巳秋初驟得半身不遂之疾予往視之祉字以新刊陳石閭集及遼東三家合集見贈石閭先生與李鐵君戴遂堂以詩鳴乾嘉間世稱遼東三老沈歸愚稱其甘老布衣耻言名利鐵君序其詩謂如頌鐘雅瑟淪淪乎大雅之音三家合集者可民先生鹿苹齋詩文集及房仲南隅夢草堂詩草新民劉東閣看雲聽濤館詩也子勤前輩

弁言謂三君子英儒瞻聞所謂琢玉工射鵰手實爲遼東文獻之巨擘二書寫刻俱精均由祉宇節食縮衣而成其關心鄉邦文獻表彰耆耆著述之盛心至可佩企祉宇又命其長公子蘿裳取書室中所藏手寫雪石齋詩集一冊見示且鄭重而言曰予平生所爲詩多不存稿蓋不敢自信也此冊所錄僅一百三十餘首設不幸溘先朝露即此拳石勺水略見平生志趣大略而已子其爲我序之予唯唯受命庚午春間予亦爲病魔所困未遑握管且私意祉宇清門懿德宜享大年末疾牽纏不足爲患弁言之作勿庸汲汲也不意庚午仲夏之月旬有三日祉宇已長辭人世矣蘿裳世兄函來言病中屢屢詢及詩稿盼弁言

之速成死別吞聲負我良友痛可言耶可民先生與祉宇兩家之詩予於辛亥以前已選入四朝詩史甲集畢節葛霞仙戶部撰可民先生墓誌述及茲事稱其昆季濟美輝映後先祉宇詩筆俊邁而含意沉鬱古近體詩有學步陳石閭先生遺集者且與可民先生鹿苹齋詩則壘篋合響沆瀣流甘尤如豐城雙劍可合而不可分然在心爲志發言爲詩詩之不同如其面焉固不必就聲音形貌刻舟以求劍也冊中觀奕六首落葉四首均和我之作落葉集別刊行世海內亦多有傳誦者今蘿裳將以此冊付刊附於遼東三家合集之後因詳述顛末以爲序且抒予悲詞費之譏明知不免九京可作聊償夙諾而已抑予重有

感焉吉林成竹山太守多祿懷德趙迺唐禮部晉臣皆予與祉
宇之詩友也二君均卒於戊辰冬間竹山有澹堪集迺唐師竹
齋集若與雪石齋詩合刻可稱遼東後三家集或改稱遼東六
家合集蓋六人年齒雖有長幼而行輩相同似無先後之可言
澹堪集生前已刊行迺唐祉宇兩家遺詩尙遲付梓迺唐詩稿
已由其叔子友松編成若干卷友松名鍾喬受業予門其能傳
家學與蘿裳同蘿裳與友松倘以予言爲然予將合三家之詩
爲之點定他日流傳藝苑與清初六家新城秀水諸公媲美未
始非遼東文獻之佳話也爰附記之

師竹齋吟草序

孫嶽金

嘗思文章氣息原於心性其文理艱深者其心思必苦其文情
樸茂者其性質必純以此論人以此衡文百不失一惟詩亦然
李杜詩詞光燄萬丈其渾括其超邁各有一字一句不可假借
處亦其心性異也吾迺唐趙公天資深潛純粹嫻雅人也其爲
文沉浸醲郁纏綿慰貼亦肖其爲人弱冠入童子軍一戰而勝
補博士弟子員嗣登賢書主講榆城書院文名藉甚然終未嘗
以詩見辛亥國變公以禮部郎解組歸來值國步之艱難覩時
事之遷變凡龍蛇大陸風雨狂瀾天南地北之旱乾水溢勞人
思婦之怨望咨嗟偶有所觸輒寄於詩如哀戰傷亂憫農朔風
諸作憂深慮遠何等悱惻或名山勝水瑤草琪花因物起興觸

境移情如惜花惜春傷柳釣歌諸作低徊往復何等寄託至尙論一二畸士偉人若謁楊椒山祠若謁張桓侯廟若易水弔荆卿若博浪沙懷古以蒼堅老辣之筆寫沉着痛快之思誅奸雄於既死發潛德之幽光雖古之作者何以加茲他若與孫吏部師鄭公往來贈答步韻而不爲韻所拘限題而不爲題所縛以及皇極門監禮南郊陪祀諸什戛玉敲金銖兩悉稱宜師鄭公之稱贊不置也披閱數四雖詭怪離奇不拘一格總之不離乎纏綿慰貼者近是讀先生詩如見其人矣此集自甲子以前經孫師鄭公釐定爲甲集己巳冬以次油印將以付梓公之四公子友松以全稿見贈復來函諄諄以數言爲序余素不工詩惟續修懷德縣志

與先生里居密邇同學數年而知其平生者既詳且悉則亦義有不得而辭者矣

師竹齋叢著序

楊書升

迺唐禮部余之京曹舊友也朝夕過從杯酒言歡得於麗澤觀摩獲益良多矣其文章經濟冠絕古今而復謙抑爲懷不事表暴鼎革後即息影園田讀書自娛閒則吟詠尤工翰墨望之斌媚多姿如初寫黃庭恰到好處徜徉於山水之間課子教孫以是終身焉耳真神仙中人不啻也余於庚午春館於禮部介弟芾棠公之家塾藉授課以避喧囂且藏拙也是時禮部已捐館年餘矣一日禮部之世兄友松循循雅飭溫溫恭謹頗有乃父

之風談次間言語詳審有倫有脊必則古先又復退然若不勝衣竟以父執事余余愧弗當然一望而知爲佳子弟也不勝欽羨之至當此歐風東漸子弟囂張之習舉國若狂入事父兄出事長上闕然不講求如龐公榻拜者間不一見若友松者誠空谷足音也既而來函附以禮部師竹齋吟草兼孫吏部師鄭同年序言孫進士酉山契友跋語洋洋灑灑千餘言禮部一生學行道德之蘊蓄胥於是畢宣矣窺鳳一羽即知五色之備詎得云詩爲小技緒餘乎哉班馬文章李杜詞藻固獨有千古然後之視今猶今之視昔千載而後焉知禮部之詩不輝映後先更駕而上之乎乃忽於中秋節前日友松又來函附以禮部平日

續修懷德縣志

卷十一 藝文

三十五

新北京福文盛印書局印

一切雜著哀集一編顏曰叢著付印成帙並孫吏部同年序文且囑余賜以一言余雖不文誼不容辭因即是著三復讀之見其言言真摯語語精純有德有言布帛粟菽之文出於錦心繡口胥本胸臆傾瀉而出者也以是知三千三百無一事而仁不在出天游衍無一處而天不臨理無精粗言無高下造道之人淺語皆深友松有見於此用是哀集其識見有高於人萬萬者矣善乎世學士仁甫同年有言余所編輯國文非載道之言不載文以載道文即道也否則無用之糟粕耳友松能讀父書手澤常親而又哀集遺言是即載道之文也以爲如親警欬用檢行爲願即是推而廣之書萬本以傳誦使家有拱璧則教思之

無窮也且李二曲云論語二十篇即孔子之語錄也禮部叢著亦可以作是觀也繹友松跋語中韓柳之外無文章李杜之外無篇什數語云云識見之最卓者也設必韓柳李杜之外人人可以擱筆即如理學之傳秦漢以下漢有廣川隋不必有河汾唐不必有昌黎宋即不必有濂洛關閩之儒京也有是理乎哉吾人不自菲薄自不可以限量友松以是存心希賢希聖志伊學顏其蘊蓄深遠矣有是佳子弟肯構肯穫不墜箕裘瓜瓞綿綿誠不可以企及友松勉乎哉友松勉乎哉因以是言弁於首記

張節婦碑

續修懷德縣志

卷十一藝文

三十六

新京福文盛印書局印

光緒八年邑庠生朱錫九等習知董璽之妻張氏執節全貞事親撫子既垂壺範宜沐邦光不忍湮沒爰聯名具稟請旌光緒九年八月十六日蒙縣尊張查確取具鄰佑保結錄其事實緣董張氏自道光十八年于歸次年其夫董璽赴省應試病故聞訃張氏即矢志守節以夫弟董琨之子董昌爲己子時方八歲仰事俯育艱苦不渝迄今撫子成家道日盛氏年六十一歲計守節逾三十年例應請旌以維風化具詳達府十年三月十九日蒙昌圖府尊趙具詳各憲二十九日蒙軍督憲崇撫尹憲松具奏咨由禮部彙題奏請旌表奉旨董張氏准具旌表欽此由禮部行文奉省到縣董昌遵禮勒碑迄今節壽又逾二年溯

將從前邑衿稟請縣府各憲詳請具奏一切事實垂諸永久略誌如左光緒十二年六月二十六日立

蒙匪紀略

民國五年秋七月蒙古干木加卜自號大將軍率白將軍與蒙匪四百餘人潛行南犯到處招納亡命至三千餘人直趨南滿路線郭家店驛奉天礮隊擊之適一彈直貫匪礮之口乃懾服請率隊出境當斯時也駐中央騎兵二旅三團團長鄂瓊瑛探知蒙匪有礮爰選敢死隊百名懸重賞奪匪礮爲奇兵又派隊分爲中路兩翼繼進邀擊爲正兵八月十四日夜將半接電令保護出境該團爰作壁上觀矣蒙匪所經之處大肆焚掠盡成續修懷德縣志

卷十一 藝文

三十七

新京福文盛印書局印

焦土顛連無告流離失所古所謂一路哭者今竟日覩焉嗣經縣調查損失統計百餘萬元死者十數人嗚呼慘矣

二區匪劫記

當九一八事變發生之際有盜首黑虎者率千餘人攻破黑林鎮圍逼懷德城其勢浩蕩有不可剿滅之險象叢分局長爰集各村自衛團並聯絡長春民團共千人直西追擊之匪乃竄去未幾又有盜首華山者率百餘人佔據西大窪村劉思君院內大嶺村民團與匪接仗卒以衆寡不敵而退叢分局長帶警隊商團繼行猛擊斃匪數名傷者甚多而警士聶福生團丁朱城奮不顧身被流彈陣亡焉嗟乎大嶺迤西素爲馬賊盤踞之區

肆擾之境況當徧地皆匪之時若公主嶺若黑林鎮若懷德城均受莫大之損失獨大嶺鎮安然無恙豈非不幸中之大幸哉

黑林鎮匪劫始末記

民國二十年十月十九日突然匪首綽號遠來者懷德警察礮

隊劉隊長也率匪千餘人帶有迫擊礮兩尊射彈機若干

均有警局武器亦係

民間膏血直搗黑林鎮街如入無人之境警甲抵抗無力均避入萬發

泉利德魁兩號院內竭力固守勢甚岌岌其餘商民數百家同陷匪阱最可慘者該匪殘忍兇獷至斯已極藉放火以示威以殺人爲行樂擲架無分貧富拷掠遑恤婦孺處此萬分危急但求保全性命奚顧其他當由商民兩界敦請黑林鎮農會長王

續修懷德縣志

卷十一藝文

三十八

新京福文盛印書局印

俊臣出爲餌匪之計以解倒懸密求救援之兵以期殲滅該會長爰隨同衆人貿然前往行至中途竟被流彈以歿情切救人智昧保身嗚呼惜哉顧性素慷慨置死生於度外維桑與梓可告無愧其義勇亦有足多者當斯時也匪知外乏援兵毫無去志擬分股擾亂附近村屯適有懷德搜查隊長吳慶霖者帶隊扼守卡倫河口聞耗即欲赴援以兵力單薄會同三道崗尹家屯兩村自衛團約集四百餘人於二十二日夜由西街進攻卒以寡不敵衆被匪擊退該隊長以懷境無兵可調即單騎逕赴公主嶺求救日本軍事當局於二十五日辰刻派來飛機兩架向地投擲炸彈霹靂一聲匪徒喪膽棄馬拋鎗爭先逃命吳隊

長先將警團布置街外趁勢夾擊傷匪甚衆逃出羣匪向北奔竄飛機復跟踪追擊三十餘里斃匪一百餘名該鎮始恢復焉是役也日軍救援深恩固宜永示弗諼而吳隊長擊斃出力亦應昭茲來許也故記之

毛家城匪劫記

毛家城在八區與長春長嶺雙山梨樹相毘連素爲賊出沒之藪而莫甚於九一八事變之際當斯時也中國之隊完全撤退日本當局未暇顧及地方紊亂人心動搖當地貧民及無賴流氓乘機而起招徠各處土匪千百成羣焚殺姦掠古今罕覩乃迫擊礮中隊譁變以該區爲根據地藉礮火之威以肆其獷悍

續修懷德縣志

卷十一 藝文

三十九

新京福文盛印書局印

殘忍之性老弱轉溝壑壯者逃四方其幸有子遺者仰賴天氣和暖水不結冰耳匪徒如毛未遭撻伐而王永清又來毛家城鎮極力招降設司令部委團營長不但本境之匪如蠅遂臭即他縣之匪亦如蟻附羶果能束以軍伍率以敵愾亦吾民不幸中之幸孰意爲官者無俸給爲兵乏餉需仍散住各村肆其饕餐民有何辜遭斯慘劫如是者二月有餘縣署始派員來鎮令其即日開拔去後民間始有生機之望然已十室十空矣余幼時聞父老談馬傻子之亂每疑爲言之太過今竟目覩之故叙其梗概以告後之人庶不致如余有幼時之疑也噫

詩

年來奔走道途吟詠久廢俗塵五斗撲面紛來每觸抽繭
之思輒苦翻蓮之拙今歲夏五家居多暇讀史之餘覺胸
臆間格格作吐因就目前之景並鄉閭習見之事點綴書
之共得雜詩三十六首言之不文固不足爲外人道也嗟
乎飛鴻印雪孰識來因宵蟀吟風何非天籟慨登山兮無
屐幸漉酒之有巾不知秋思在誰家敢云寄興唱到竹枝
聲咽處未免傷情爰書短札以質同人己亥天中節後八
日看雲主人自記

烟和日暖暮春天節序怱怱又一年何處泥人風味好酒帘高
掛夕陽邊

續修懷德縣志

卷十一藝文

四十

新京福文盛印書局印

杏花開罷李花開芍圃薇牆巧樣栽二十四番春信杏園丁逋
負又催來

拂堤垂柳挂征驂春色如斯我不堪同是一般惆悵恨惜無人
賦望江南

鎮日春寒永閉門韶光消盡幾黃昏栽花插柳無多事一卷詩
編舊手痕

春風幾度燕歸巢掠水銜泥一剪拋百姓蝸居王謝屋可能相
對說魂消

經旬未到碧山阿花信番風轉瞬過不是尋芳心意懶一春陰
雨較晴多

敲得金針作釣鈎游魚不餌水空流風波可耐心難耐世事多
應緩處求
郊甸初生苦菜芽兩三葉茁漸成花看他十五盈盈女手把筠
籠當採茶
鄰翁告我昨樵蘇換得盈盈酒一壺囊底尙餘三百片邀君歡
飲莫愁沽
鯢浪鯨波國步難九州新政起民團蒼生自古懷忠憤參伍誰
爲曉事官
比戶喧傳閱武期暫拋耒耜走旌旗圖開霸棘眞兒戲今古人
情託便宜

續修懷德縣志

卷十一藝文

四十一

新京福文盛印書局印

迢遙一線接東隅軌鐵輪金挾火馳莫怪虞公甘假道百千萬
里不須臾
毀徧蝸居又割田卻肩泥土換金錢隋珠彈雀渾閒事失不償
貪信可憐
千金值產萬金鄰底甚分疆動怒嗔極目長城衰草外秦皇漢
武是何人
何事昌黎闢異端教壇門戶至今寬麥孟撤罷先魂餒從此黃
泉乞食難
明朝又記佛生辰一瓣心香祝萬春塵世未教逗粧裏尋芳臈
魅敢窺人

錦衣驄馬少年行慣向人間問不平一笑酒家樓上去寶刀新
脫贈交情
雲鬢新梳墜馬嬌漢宮梅額楚宮腰千秋不入陳王賦龍蜿鴻
翩總寂寥
碌碌風塵逐馬蹄未能免俗也招携伊誰冷暖誰恩怨轉瞬飛
鴻印雪泥
最無憑準是天心莫怪人心反覆同昨日微晴今日雨明朝噓
拂又東風
花驄油壁間笙歌邨近朱陳只隔河填慣橋梁知送喜連朝烏
鵲鬧聲多

續修懷德縣志

卷十一 藝文

四十二

新京福文盛印書局印

嫁女期臨百事忙阿姑拋剪姊縫裳不須苦說宵靡旦三日還
羸醉一場
姊搖柔櫓妹撐篙蓮葉蘩中泛小舸湖面水原平似掌怪他風
急起波濤
巢栖老衲久忘形作畫吟詩寄性靈畫自摹神詩寫意水光山
色一床青
一頂烏紗製錦圖封侯無相惱頭顱天寒日暮前途遠回首春
風叫鷓鴣
郡邑觀風學使臨兩行淡墨報泥金臧倉果解通戎御今日王
良獲十禽

蜂起狐鳴晝日霾
萑苻風動喚狼豺
北山羅網南山雀
爭把奇勳策病骸
藤花門巷讀書聲
矮屋紗窗透紙明
一種古人摹得似
芸編帶結鄭康成
嬾晴天氣麥風涼
城市人歸菜把香
滿境綠雲歸去晚
烏啼春樹正斜陽
宛轉歌詞白雪輕
手調絃索度新聲
樽前唱罷吳孃曲
愧殺鄰兒浪得名
連村磨石急鴉鋤
紫笠青簑雨過初
但得草萊無碍稼
且饒新綠莫刪除

續修懷德縣志

卷十一 藝文

四十三

新京福文盛印書局印

桑麻情話總依依
野鳥鄰翁兩忘機
坐久不知磚影盡
桃花片片向人飛
灌園老圃自風流
盈把蕪菁帶雨收
問訊何年助烟火
田桑八百武鄉侯
蹈遍青山路幾層
林泉深處闢鱗塍
漁翁覓得桃源宿
不逐扁舟下武陵
朝朝園課鎖柴關
引水澆花意不閒
摘出蕊宮千萬朵
始知春色徧人間
五夜蘭膏繼晷焚
探奇索秘攷遺文
何當樽酒重論會
惆悵江東日暮雲

丁巳和秋詞之四

紛紛本葉下秋聲一枕離披夢不成惱殺昨宵風雨惡最無聊
賴最關情
衰柳蕭疎落照遲御溝流水颺塵絲年來春恨知多少訴與西
風恐未知
瑟瑟秋風太液波曲欄低亞晚涼多昭陽一片斜曛影幾點寒
鴉背上過
斗轉參橫夜未闌沉沉明月掛檐端可憐大地山河影只向蟾
宮鏡裏看

詠菊

續修懷德縣志

卷十一藝文

四十四

新京福文盛印書局印

一種丰姿迥出塵雪霜堆裏見精神只因趨熱都無骨不向東
風展笑顰
三徑叢荒繞碧苔梧桐飄盡曉霜來不爭顏色爭風骨的是秋
風第一開
重陽一別又經秋香滿籬根花滿頭記取片言聊贈汝不風流
處轉風流
不將脂粉逗鉛華冠帔裝成自一家漫道詩人多浪癖故園今
日已無花
霜寒風緊報秋深一帶殘叢滿徑陰淡極也教花絢彩本來人
世重黃金

曉霜籬外射朝暎點點黃金撒滿門風雨不來秋正暖惜芳畢
竟是天恩
雁鴻影裏霜先到蟋蟀聲中酒乍沽一帶短籬雙白板等閒描
出賞花圖
不畏霜風不怕寒亭亭仙骨獨闌珊秋來總有花開日未許旁
人冷眼看
年年生意寄籬邊逸韻幽香每自憐捧出一枝清豔骨方知富
貴不神仙
羣芳譜裏舊知名秋士誰堪問落英今歲重陽花事好更無風
雨滿江城

續修懷德縣志

卷十一 藝文

四十五

新京福文盛印書局印

莫將顏色分濃淡丰韻都從靜裏生試倚闌干侵曉坐滿頭風
露不勝情

幾回荒徑鬪新泥瘦骨亭亭豔影低我比淵明更癡絕曉風明
月畫欄西
溥溥涼露又今朝瞥眼新枝破碧寥一縷清芬侵入髓縱絕非
代也魂銷
秋老清霜日漸嚴輕紅淺紫尙纖纖迎窗祇恐香痕散滿院西
風不下簾

題友人山水畫冊

亞字欄干蠟粉牆柴門臨水芰荷香最堪惆悵無人處一片蟬

聲送夕陽

十里清溪折碧流
蒹蘆風緊動新秋
江鄉自是飛塵斷
指點浮波一葉舟

遠山一角影模糊
水色天光淡欲無
爲愛錢塘風景好
故留殘墨點西湖

石徑縈紆迎碧苔
亭窗四面接雲開
不須更覓新詩句
携得倪迂畫本來

乙巳冬兩鄰和議告成

日俄自甲辰宣戰年餘始罷

大府檄所部郡縣興設

學堂蓋前此執政以停科舉入告緣帖括習非所用塞彼而就此求通材崇實用倡新政之首也邑侯廖公招

續修懷德縣志

卷十一 藝文

四十六

新京福文盛印書局印

集紳耆會議公署途次偶成

凍雲拖雪朔風號
壓路寒威襲短袍
地枕幽營開北極
天臨星昴接南交
十年烽火籌邊急
百代衣冠變制勞
從此掄才開廣廈
他時應不負鈞陶
鼙鼓烽烟盡日霾
旋聞北杏舊盟開
衝濤鐵艦橫戈入
敵血珠盤浴劍迴
化後蟲沙歸大劫
殃殘魚火當凶災
諸君莫歎亡羊失
補得牢棲是異才

潘垣題壁

蜿蜒長白接天都
豐鎬曾傳啓駿圖
三萬里餘新粉本
四千年外大蘆廬
遼猶想唐舟壯拓
塞徒傷漢郡蕪
簑笠一身驚歲

晚可堪滿地極江湖

送劉子才茂才有序

辛丑十月子才茂才解館南旋詢據孫君寄蘇云子才復州人時館協力堂家尺素告違

頗有江文通黯然銷魂之感維時涼飈穿屋寥聲落簷
短几燈青長階月白柳有情兮惜別花無語兮緘愁渺
渺予懷茫茫歧路憶自客春銜恤後捐棄筆硯迄今閱
月二十有一茲以風流雲散觸緒牽情敬援祥琴禮例
賦詩四章聊以贈別嗟乎一聲羌笛鴉邨返照之天半
壁金甌鯨浪橫流之日既感時而撫事亦對酒以當歌
披是詩者微特梅開兩摘鶴侶心殷行看菊就重來鴻

續修懷德縣志

卷十一藝文

四十七

新京福文盛印書局印

泥爪印矣

乾坤莽莽黯風塵飄泊天涯寄客身儘說多情推我輩可堪知
已少斯人從君卻正終思蜀歸里淵明慣避秦此去家山梅訊
好一枝應贈故園春
漫道戈船控上游邊防營壘孰防秋鷓鴣聲兆天南運騏驎途
傷水北流塵夢十年徐孺榻鄉心千里仲宣樓知交自古渾難
別五字河梁起暮愁
塵沙撲面曉風寒雲海遙空望渺漫千里迂威雙客屐九州落
拓一儒冠名微山麓藏身易世亂文章報國難剩有龍泉孤鋏
在莫輕低首向人彈

華夷混合古今同，蠻角蛟眉戰鬪中。一切楸枰翻世局，百年鉛槧誤英雄。秋風苜蓿肥征馬，夜月菰蒲翥塞鴻。樽酒盛衰成敗裏，爲君高唱大江東。

寄贈下宿源茂才兼柬趙迺唐禮部芾棠刺史

蕭齋寂寂火雲流，槐影參差轉玉鈎。萬里河山秦失鹿，十年災沴魯無鳩。時有疫症懷人得句兼酬答，宿源來書附詩甚夥課子繙經當校讐。指日西

溪申舊約秫田端，令老糟邱

故園東望莽重山，尺素遙傳未是艱。亂世人才多縱酒，少年朋齒半頽顏。王通衍教河汾老，宿源連年設帳周黨全名廣武還。迺唐自國變後便隱居不出矣檢

點白雲篇數帙，詩書常伴一身閒。

續修懷德縣志

卷十一 藝文

四十八

新京福文盛印書局印

紫帽素驄憶上都，清歌一曲倒金壺。搜腸覓句吟懷健，指掌談兵醉膽麤。三徑朋簪明孝若，六朝詞筆庾肩吾。乾坤俛仰成今昔，慚愧高陽舊酒徒。

毒龍妖鳥競縱橫，寰海烟塵黯不清。鶉首剪餘天竟醉，鼈身轉後地同傾。黃梁久熟塵中夢，白髮偏饒世外情。幾度華嚴經佛劫，相期携手話無生。

詩成倥偬未寄，忽忽兩月而秋氣深矣，再賦二章以代投札

又是西風蓺菊天，楓林霜信雁初傳。晴烘睡榻當書幌，醉典朝衫換酒錢。漫指嶺雲間出岫，有如江水不歸田。藕花汀畔行人

路倚杖思君倍惘然
搔首重登諫議臺蒼茫天地實悠哉苦飢方朔今無狀癖飲劉
伶舊不才文字敢言千古事烽烟併入九秋哀何緣一掬滄溟
水淨洗塵區朗鑑開

謹按看雲主人榮戶部祉宇之別號也綜一生所作詩
有七八百首而采入雪石齋詩集者只一百三十餘首
如前錄七絕四十首均不在集內則遺佚者多矣惜哉
茲將有關於本省本縣者擇要采入遵志例也

賦得花落知多少

得花字

孫嶽東

多少飄凌感關心最是花知從風雨後頻起夢魂嗟影定瑤臺

續修懷德縣志

卷十一藝文

四十九

新京福文盛印書局印

減陰難畫檻遮縱留餘豔在却惜亂紅賸

賦得山深四月始聞鶯

得深字

自爲聽鶯計山居始悔深如何萋秀月纔送管絃音候未分秧
屈音偏疊嶂沉谷風來習習夏木囀陰陰

賦得竹深留客住

得留字

未到森森竹何堪結勝遊客來曾不速深處竟常留密布千竿
蔭涼生一味秋坐邀佳士入徑愛綠雲稠

賦得久旱逢甘雨

得甘字

久負雲霓望何能大旱堪正逢人盼澤倏慶雨流甘計日常愆
十爲霖却沛三喜從無意得味恰受和參

賦得大雨時行

得時字

不作廉纖態滂沱雨應時大真同聖化行可比王師濤訝銀河
瀉檐驚瀑布垂繁聲催暑退飛浪挾風馳

賦得春入鳥能言

得言字

鳥未逢春入能言似忘言喜音非欲闕好語不輕喧直以良時
得難將巧舌捫聲傳楊柳陌聽到杏花村

賦得烟花三月下揚州

得花字

一作揚州客春來景倍嘉六朝開畫稿三月足烟花雲水孤帆
路風光十里霞雨濛紅杏膩城鎖綠楊賭

賦得忽見陌頭楊柳色

得頭字

續修懷德縣志

卷十一藝文

五十

新京福文盛印書局印

無數垂楊柳蒼茫指陌頭幾時曾著色今日忽登樓細縷千絲
掛長堤一望收魂銷前夜雨眉鎖隔年愁

賦得歲寒知松柏

得知字

歲未嚴寒到奇才總莫知愛茲松柏性用作棟梁資春雨桃千
樹秋風桂一枝節高羣卉外賞在後凋時

謹按貢三先師詩文久佚今檢舊篋得改試帖窗課數
首雖碎金片壁亦足徵非凡品矣

雲章附識

題師竹齋吟草

孫嶽金

國事嗟何及煩情付闕如一樽陶令酒萬卷鄴侯書興至無真
草文成任毀譽常留詩卷在佳話說鄉閭

偶成

艱難困苦有誰知一點雄心誓不移
驥老寧甘終櫪下鳥鳴應有止
喬時唾壺擊缺歌聲壯彈鋏歸來
嘲語嘻未解此生何日了聊將晚
景當朝曦

南北奔馳老大年
煢煢故我尙依然
不才敢棄班超筆
尙友常懷祖逖鞭
半榻琴書銷壯志
一燈風雨伴孤眠
平生學業知何似
贏得囊中未積錢

雨夜聞鐘

趙晉勳

中原正多故而我獨逍遙
感世詩千首臨風酒一瓢
清談空歲月好夢到漁樵
愁聽東街市鐘聲夜湧潮

續修懷德縣志

卷十一藝文

五十一

新京福文盛印書局印

晚晴樓

連朝細雨忽東風
片片殘雲散碧空
九十春光何處好
晚晴正值杏花紅

寄身稼圃度春秋
五十年來尙黑頭
飲食兼人腰脚健
偷閒更上晚晴樓

題于烈婦事略後

事詳孫師鄭龍江正氣集

趙鍾喬

閨閣精研孔孟書
芸窗課弟注蟲魚
媧皇計拙天難補
漆室心悲憾有餘
侍疾曾嘗三世藥
捐生寧羨百年譽
乾坤正氣存巾幗
入夢貞魂淚濕裾

巡鄉有感

孔憲熙

山林湖澤倦馳驅

蒞寧安年餘下鄉五六次周歷殆徧

屢問瓜期未有期但使荒蹊成坦

道創修甯海汽車路六十里行旅稱便

不教數罟入汚池

有以滾鈎在鏡泊湖捕魚者每次數百十斤下令嚴禁之

蠲租無補三農

苦邑多逋欠呈准減去十五年以前罰金及地方各捐特例也

發粟難除百里飢

十七十八兩年春均請發放積穀

羽檄紛傳邊有

警中俄衅起徵調正煩

輿人私誦太平時

浮沉人海幾經年

自光緒末年筮仕畿輔又南游蘇浙凡二十餘年無所建樹

鏡裏鬚眉只自憐賤日布荆

甘淡泊遲來兒女倍怡然

年及五十五新生子各一

難期吏治崇經術怕有流民

負俸錢當軸於今重農事家山無恙好歸田

和孫君襄文原玉

事變之後縣治南遷舊城內外屢遭匪患蕭條殊甚孫

縣長潤蒼蒞任後巡視舊治邑人佇候旌旗欣欣色喜

續修懷德縣志

卷十一藝文

五十二

新京福文盛印書局印

孫君襄文賦詩誌盛憲熙因事旋里聞而慕之依韻奉

和用寄所懷

炊烟蕭索歎懷城劫後思瞻召父旌覓句屢驚租吏衆

本邑租賦由蒙王徵收警學各

捐由縣權索村公費區村隊餉自衛團費則由各主辦者按戶追討大有迎接不暇難以應付之勢

績麻常借月輪明

今秋糧賤紅糧一斗僅易豆油二斤貧戶多不秉燭村居

竈冷兵如火

夏秋之際警團各隊以農商爲逆旅強索酒肉曾見老農以磁瓶出售購酒面以待兵余住某商號數日遇中隊兵嫌食無肉而怒者二次

官廨堂空訟

未平

法署隨縣治南遷西北居民距縣署二百里幾於無所告訴

聞說賢侯臨舊治福星一路慰羣情

謹按孔君字郁吾以優貢起家宦遊直隸蘇浙吉林各

省所至有聲然終末嘗以詩鳴茲錄巡行二首係采甯

安唱和集和章係返里所作今讀之一則可作治譜觀

一則如繪流民圖也豈止詩云乎哉

秋日感懷

榮紹鉞

悔煞無端作客遊等閒容易又經秋滿城風雨重陽近四野烟
塵極目愁投筆班超空出塞依人王粲怕登樓勳名未建羞窺
鏡朝尙青絲暮白頭

自歎

孫仰夏

漫道機緣總錯過廿年身世感蹉跎看雲每悔常離岫觀奕偏
驚已爛柯日對簿書成俗吏時談格調近詩魔何人携我溪山
畔結伴漁樵興趣多

病中吟

胡作新

不事茶爐事藥鐺漫言疾病是愁鄉春蠶飽後絲將縛秋菊霜
續修懷德縣志
來味乃香萬物皆由安逸敗一身莫憚苦辛嘗試觀否泰循環
理歷盡三陰始復陽

其二

繁華徵逐惹愁思除却繁華靜最宜休戀杏桃春暖艷猶憐松
柏歲寒知鐘聞清夜眠應覺花被狂風護未遲簾內晴光簾外
月瓣香危坐默叅時

秋月書懷

卞會瀛

五十年華付逝波故園株守意如何着書有願傳難必看劍無
心鈍待磨禮祛煩文嫌束縛詩不言志漫吟哦炎涼頃刻殊情
態莫惱秋雲薄似羅

其二

盱衡身世悔多愆
虛擲光陰五十年
道義難肩甘不朽
師資枵腹愧薪傳
好隨田父心常逸
幸遇詩人句漫聯
莫動西風蕭瑟感
此間可樂且盤旋